

山水蒙聖功神化運混沌育元精蓋人倫稟協無出一炁之元若夫善願元鼎善運一炁是不足度于五行可成真道復命篇曰東南西北要精通交感乾坤雌與雄火候直須牢穩審吹嘘全藉巽家風陰符經曰天發殺機龍蛇起陸謂後弦之前東南巽位地戶也坤寄體地戶坤母索一一生屯就二而索三成蒙難易同氣相求剛化先柔使神有所度而氣有所流動法運天根發巽時以據內動蒙屯生成之數加四奇八耦象日月之右轉三百六旬度之載已土而養金鉛專以鼻艱始青真炁入于泥丸金生真水燧爐火候結練陰符經曰人發殺機天地返覆謂前弦之後西北乾位天門也乾本位天門坤無定位月節臨乾蓋乾坤三變而興否泰居寅申也寅生離火成已土申生坎水伏戊火也靜法守地根在乾時而當外存乾坤二策之數否泰日往來如天道之左旋三百六旬一周戊火以襲木汞次以舌下華津飲三十六

嚙使火化真土變神以御玄靈正陽真人訣曰身中用年月日中用時刻謂以日為年以辰為節也但任外神遷變而以內氣固養外當隨化應時內得神堅氣固以此修之最為捷法也下士遇化而歸真真士開度以上昇玉虛太清章曰玉虛之始化于太清變運上極持正入真化炁攝穢匡御眾靈鍊寶回光五常集嬰律令統紀度拔眾生神降炁平保練常寧以入真眾諸魔潛傾此道名上境學者謹諦聽日月至年運修進無回停大功三萬日小功百日升應有緣法士用之以虔誠速度諸業海超登上玉京故知玄帝修四十二年成茲上道得證諸神通矣

太上說玄天大聖真武本傳神呪妙經卷之三

太上說玄天大聖真武本傳神呪妙經卷之三  
鄧人方田子佩昇玄內教錄陳俗集疏  
是時真人再拜稽首曰臣之慶幸荷此綸辭妙行稱讚紫微敷演乃經綸端緒之教然其玄武之將軍乃玄元之應化其始之迹其事云何願賜詳言以開蒙鄙

蒙者不知也鄙者不慧也故妙行謙和宣明開析玄武詳節普使會眾咸聞靈因亦願三界人天盡知玄武妙紀深趣之旨要也

於是紫微大帝敷以玄言釋彼所因解無上事昔大羅境上無愁天宮淨樂國王夫淨樂國君能聖哲主務而感生玄帝繼踵於考命終日得乘生前所種清信功力命起無愁天宮承飯天之廚箱受諸快樂自然虛皇經曰人有千善福及七祖死鬼為仙萬善既備玉符下迎千神來朝白日登晨玄帝修真果效奉天詔曰九五老天君降言曰子之聖父聖母已在九霄美九霄境乃玉虛無色界中列三十六天宮總

隸大羅三境玄帝父母得居龍變梵度天無慈官中按紫光經云淨樂國境乃海外仙國在西域月支國之西星分奎婁二宿之下

善勝皇后夢而吞日覺乃懷孕其母氣不納

邪日常行道既經一十四月乃及四百餘辰於開皇元年甲午之歲三月三日午時降誕於王宮相貌殊倫後既長成遂捨家辭父母

按降筆實錄云玄帝降誕時正當上天開皇初劫乃下世黃帝紫雲元年歲在甲午

戊辰月初三甲寅日庚午時符太陽之精託胎化生產母左脇當生之時瑞雲覆國

異香芬然土地皆變金玉瑞應之祥茲不盡載立小字曰安于生而神靈舉措隱顯年及七歲經典一覽悉皆默會仰觀俯察靡所不通潛心念道志契太虛願事上帝

普福兆民於是父王不願抑志年十五再辭王許賜道號曰潛雲子按實錄云太上賜玄帝李姓蓋取宗化之源按西域國西州天山壇降筆載聖父王諱告姑伏玄帝

王諱乞按啓聖記玄帝應化唐時裴姓諱仲芳按本生經祖諱牛孛宗諱端受右暗諱四字賊瞎言乘凡對聖席語宜令勿犯上諸王諱本經內有言乘二字可密音默誦之以當回避也如獻款投詞祈求所欲者於玄帝疏內無得書記諸諱字諸兩字諱者不許聯用如是單用一字書令字不完

入武當山修道四十二年功成果滿白日昇天玉皇有詔封為太玄鎮於北方顯迹之因自此始也

武當者古名太和山按九五經緯天地曆曰禹平水土之後分治九州拜立五嶽定封四瀆範圍厚載之德名山大川悉以神聖主之乃考翼軫之下有山曰太和故老相傳云上古玄武得道飛昇之地更太和之名就封曰武當山按實錄云王子離宮尋訪幽谷遂感玉清聖祖紫元君授無極上道元君曰子可越海東歷於翼軫之下有山自乾允起迹盤旋五萬里水出震宮

自有太極之時便生是山上應顯定極風太安皇崖二天之下子可入是山擇衆峯之中冲高紫霄者居之當契太和升舉後二千五百歲龍漢四劫中當披髮跣足攝坎離真精歸根復位上為三境輔臣下作十方大聖方得顯名億劫與天地日月齊并是其果滿也語畢元君升雲而去王子乃依師語越海東果見師告之山山水藏沒有七十二峯一峯聳翠上凌紫霄下有

一崑崙陽虛寂於是採師之誠目山曰太和山峯曰紫霄峯崑崙曰紫霄崑因卜居焉

潛虛玄一默會萬真四十二年大得上道至黃帝紫雲五十七年歲次庚寅九月丙戌初九丙寅日自清晨有祥雲天花似雨而下迷漫山谷去山四方林巒震響自作步虛仙樂之音王子拱手立于紫霄峯上須臾雲散見五真羣仙導從甚盛非凡見聞悉皆降集王子稽首祇奉拜迎五真曰吾等乃九五老君准奉三清玉帝詔命與子啓途日當午五真宣詔王子再拜稽

首興受詔領賜品儀易服訖乃欽圭奉乘  
飛雲玉輅羽蓋瓊輪上昇朝赴九清境矣  
夫玉皇有詔者是斯經內一百六十八字  
天書篆文也承此赴除太玄之職方始顯  
迹於凡知有所修之因也

真人稽首再拜大紫微大帝曰玉皇詔封必  
有妙旨敢問大略以開小聰爾時告於妙行  
曰天書秘密何可談揚恐泄天機深為不便  
大梵隱語奚使衆聞

此極中天紫微令事遵佐金闕昊天發敕  
讚勞履勉約束論事而已時依應三清玉  
帝璽書頒降准事施行畢騰秘于紫館况  
明真有格未易冒禁露談實訓恐致輕泄  
之愆也於時妙行開存衆之誠請問大帝  
旨意之故謙謙然實情持為遍衆信結誓  
立盟使夫理志合儀者矣

妙行真人拜手稽首復奏言曰臣雖緣薄聖  
必恩寬曲念衆真特垂大便苟輕泄慢當墮  
惡途萬劫千生長為下鬼  
六趣雜滌輪回總號惡速應是冥官幽吏

皆曰下鬼

是時紫微大帝念此真人著意勤奉再三請  
問遂宣帝敕以示衆真

拜手者執簡啟壇禮跪也稽首者俯首至  
地俯伏也三請者則九拜手三三俛興也  
妙行慙慙奏請遂乃設誓雖緣淺薄不敢  
口敬心違違者甘當處下鬼之趣勤奉為  
衆三請蒙大帝敕旨遣給事侍中啟琅函  
玉匣出示玄武飛升天詔宣唱也

夫此秘言金書篆字大方一丈號曰天符見  
之者永處天仙聆之者不歷地獄  
言夫此秘者顯吳極三天門下金闕誥命  
璽封獎其天符尊崇也按寶錄云符篆詔  
製乃天真皇人撰及書也字大方一丈者  
則八角飛芒各一尺篆跡也曰赤書玉字  
之體以金錯成形也得永處天仙是斯會  
無極仙曹咸獲瞻見當增其品秩矣次聆  
聽者因東漢之季太上降勅授微士張真  
人道陵玄武之經使流傳于世張君乃以  
金篆詔書文義易作凡間書體泱濟學道

之人使夫誦念及聆之者保毓賢官太玄  
之氣堅固耳宅門戶之聰使地司黑簿無  
得書執曾歷八百功德之人也是等學人  
命終之際死竟不當墮入地府獄中按天  
師杜光庭集道炁初布混漢無形悉凝於  
浩莽之間文結於太空之內曲折成字八  
角飛芒元始命天真皇人象形摹寫名曰  
天書玉篆乃為文字之祖體也  
其詔文曰

此經天符詔語乃依降筆寶錄本書

金闕昊天三省門下牒奉

教學仙聖童淨樂王子淨樂國子十五志道

惟卿玄元之化太虛本炁天一之尊太陰天一



不言而教守中忘言莫知其神惟德至神

渺渺劫仞善釋魔乃綿綿若存綿綿長存

虛心實腹清心寡慾和光同塵守味同始

鑿開造化鑿開虛已化鎔化至精朴散胚渾現於旺渾

六百萬歲延原劫初八十二身五靈老始

曲全枉直曲已達道窪盈弊新若水下物

生陰育陽陰生陽育起死成人起死留神

其功不恃其功不恃其德乃真其德乃真

今宜再顯今宜再顯永鎮北吳永鎮北吳

上罰逆象上罰逆象下滅妖氛下滅妖氛

掌握圖籙掌握圖籙攝制魔蹤攝制魔蹤

帝真靈會帝真靈會驅神駕龍驅神駕龍

周環六合周環六合普福兆民普福兆民

道容天地道容天地萬真所推萬真所推

可特拜太玄元帥領

元和遷校府公事冊

到奉行

到奉行

紫微乃言告真人曰此文者玉皇秘敕天帝  
微宣不可輕傳恐遭降責

紫微大帝所寶三宣初敕曰天書秘密何  
可談揚恐泄天機也次曰玉皇秘敕不可  
輕傳恐遭降責也末曰非乃至人秘之宜

也誠授受者恐口發心違也因緣經曰凡  
人現世長命富貴者往世曾敬信大道妙  
義中來永劫家勢不衰者曾延奉正真及  
成就功德中來處世為人才識明了深通  
妙理達性真者曾持寶經不妄傳人中來  
也

真人稽首又白帝言臣聞玄武將軍神通至  
大不居諸位而鎮北方妙用之因神明之契  
必有與旨願釋鄙懷

妙行復問玄武洞妙因何專政位居北方  
大帝遺音告真人曰天中北上衆曜拱之以  
匪至神孰能鎮遏

中天北極之中建紫微帝庭也元和遷校  
府署乃毗紫庭之北且玄帝偉政位天官  
四帥之右導森羅萬象之前故經曰衆曜

拱之職事准玄帝功業可當也每羣真會  
朝昊天至尊則四聖為都班之首實錄云  
元始陞玉宸殿內大會諸天上帝校遷三  
界羣真登命九天司馬侍仙玉郎啓太丹  
玉匣出萬天素威功過玉曆敕金闕侍中  
司馬大神韓君丈人金闕司命可韓真人  
金闕司錄定名玉曆真人金闕司功九天  
採訪真君金闕司過九天儲福真君並開  
曆考績三官四聖之職自太虛開化神一  
挺生有保佑地化育之功奏上三清乃

命玉帝親行典儀當亞帝真之號遂詔玄  
武詣闕登七寶瓊臺之上遣金闕侍中素  
靈殿大學士三天門下直日儲靈典奏事  
全真紫陽大夫含光上德仙君軒轅執本  
齋捧吳極三天門下玉冊傳命宣賜玄武  
儀錫以通天十二旒冠玄衮上施日月山  
龍物象玄玉寶圭紅鳥玄履瓊旌寶節九  
龍玉輦玄武拜受易服訖仙君謹言玉宸  
三省詰曰皇皇大道赫赫至真太極開判  
玄元化生妙蘊樞機萬天尊仰則為聖明

主務其休隆廣焉敢不崇欽惟太玄元帥  
鎮大玄武大將軍三元都總管九天遊奕  
使在天罡北極右垣三界大都督依前領  
元和遷校府職判玄都右勝府公事太上  
紫皇天一真人冊曰靈通太妙上開混化  
之玄道備鬱明下統虛危之秀寶育天元  
撫成地紀持造化於四時推紀綱於八節  
分身下降普福乾坤功濟五千萬劫德並  
三十二天九霄上賴於真威十極仰依於  
神化有大利施於下民積聖德徧於玉曆

按遵簡錄當亞帝真敢不微崇何以明德  
賜尊號特拜玉虛師相玄天上帝領九天  
採訪使金書冊寶曰夫道生一炁感化三  
才結真于九極之華晨麗于六天之秀幽  
微煒燁洞杳飛芒功高難極合示嘉尊想  
惟鑒觀幸勿謙辭餘當上輔大道劫劫長  
存下佑兆民絲絲永祉龍文昭降水秘玄  
都謹言崇封聖父曰淨樂天君明真大帝  
聖母曰善勝太后瓊真上仙下蔭天關曰  
太玄火精含陰將軍赤靈尊神地軸曰太

玄水精育陽將軍黑靈尊神並居天一真慶宮仰觀玄帝之勲業在于今日之權總司三界功過事況真休尚賴其威輔而神通果至大歟

真人乃啓於紫微若有天人志心欽仰其於福利有所得乎

妙行真人思正萬彙順天人之心仍問欽敬福利將化人天歸向耶

大帝曰此神將是歲每月六日十六日二十六日諸天審察

此諸天者乃是色慾一界天境公事玄帝之守巡歷審察二曜三辰五行萬象星府事彈鎮不正妖孽也故本經曰每月三度統領神兵躬往諸天徧為巡察凡遇邪氣及有妖星速須剪截是斯職也色界天屬上元三炁君召諸天人眷屬事中外一十八天主尊謹著殿號中九天五炁天君主北方元靈上極天始素天君主西南妙靈寶華天九炁天君主東方玉華無極天始丹天君主東南大虛真極天一炁天君主

上方玉清虛皇天始玄天君主西北素靈皓元天七炁天君主西方玉靈素華天始青天君主東北太靈真元天三炁天君主南方南極玉文天外九天智德天尊主北方雙闕化身天威範天尊主西南至妙變

空天仁愛天尊主東方元真寶曜天慈和天尊主東南開靈傳道天載德天尊主下方中極總生天成化天尊主西北元關溥濟天義議天尊主西方成德曜晶天智積天尊主東北暉明流光天禮教天尊主南

方太平運化天色界乃無五行之所其中天人眷屬衣飯天之廚箱也本因是從凡修鍊之士而及之靈寶經註云人有百善東華註名以至三百善去身業歷淨行命終蛻殼神隨功著飛寫此境也於中增修及千善者福延七祖神龜靈龜聚為眷屬也慾界天屬中元三炁君召諸天眷也其六天十境最居下位接人間頂題名于后諸天殿號善勝天王尊北境他化自在天妙化天王尊東境樂變化天妙德天王尊

中境兜率陀天清淨天王尊南境須臾摩天靈和天王尊西境忉利天淳和天王尊護世四王天中央東方境主持國天王南方境主增長天王西方境主廣日天王北方境主多聞天王靈寶經云人有十善司命儲弄至五十善五帝友別三業漸除形神少忘得返五行之妙天命終際神鬼徑起此諸天境受大快樂也况夫玄帝稟命常保有天元矣

十洞巡遊

十洞者乃十大洞天也巡遊警察神仙公事也按朝天懺應洞天所各立仙官曹僚分掌攢集萬彙錄籍功過等事  
及正月七日二月八日三月九日四月四日五月五日六月七日七月七日八月十三日九月九日十月二十一日十一月七日十二月二十七日下降人間剪滅邪魔驅除癘瘡保人慶壽以全天命其有氣正心純忠全孝盡名書玉簡保舉昇仙更有玄科莫可併述真人稽首再拜白紫微大帝曰顯化之因則



聞命矣天人欽仰玄武將軍作何歸依設何方便而得福利幸賜一言

妙行請問歸依之人設何供禮

大帝是時告真人曰天地之內能有至心奉祀玄武一生之內不食腥羶自斃毒傷獸穢之物及於蒿惜菜大蒜葫荽魷蝗嗜慾扶屍接產若能斷得方可志心凡臨下降之辰皆有禎祥之慶

大帝語天地之內者謂天下地上大千世界中人也能有志心奉祀玄武者勤修香

火之家誠謹信奉遵依此經避忌之人實於衛生利益按應運經曰飲食隨緣不必勞神不必著見飲則通其色身血肉食則充其色身臟氣按靈寶大誠經身中元神惟務清淨不可雜食臭腥臭腥之物壅滯經源纏羅六腑又脂膏辛臊昏塞神門攻蒸五臟生諸病惱人不能知形神豈久可聽此經保人天年以除災患此乃簡要之法所宜遵戒也腥羶者龍龜龜蛇鱷黑鯉魚曰臭腥食也牛馬野獸肉曰羶自斃

毒傷自斃者乃活動物命無故死也毒傷謂猛獸攫擒食之遺刺自死及彫殘食之多命促此之謂也按孫真人食誡曰獸穢物者鷹肉獸犬肉穢齧菜乃小蒜也食多耗散精神也大蒜雖入藥久服反閉塞神

氣萌其臭透人肌膚令人多忘芸臺韭薤已上總葷菜也魷姓者竭精虧腎玄武逝後嗜慾者敗氣散神朱雀葉前扶屍者死魔驚鬼青龍離左接產者血腥衝鬼白虎亡右或候食忌物當念本經淨身神呪

則穢雜之氣出離於身內矣唯扶父母師資死屍候葬畢日外更吉服而可朝真謁聖也易繫辭曰天之所助者順也人之所敬者信也信者誠心晨昏上香朝扣玉虛之門志感太玄真人按旄部錄所循之善申明右勝府事必降禎祥之慶光輝于之門闌漸進則天佑之也

其夜

聖降之期預先一夜也  
先當澡滌身心不汨思慮

先當澡滌可預除身垢孔子曰沐浴為齋潔也非為飾也不汨思慮者却去胸中亂事太上曰澄其心而神自清又曰形神俱妙與道合真

至五更躬然香燭淨果棗湯

香通真達誠唯降真沉香可燭黃蠟者輝明祭祀淨果五果忌獻石榴李子棗湯沸湯潔日曬乾棗尹喜內傳曰神仙多以棗宴賓也淨水亦佳設淨水因昔唐追封太上老君為祖也憲宗幸廣平苑夜坐于

軒觀真武降現威容立于雲際帝炷香躬問奉祀天曹儀範真武降言藝香者可達誠誠非香則不能達于穹蒼也酌水者能滌穢炁一切清淨皆由此生故供養不可無水也語畢帝謝真武昇天矣乃元和元年八月初八夜半降唐禁中故事也觀此豈上聖所欲哉我當表誠遵此

位列有三志純于一

位列有三者遮歲三月三日玄帝宴聖父聖母於瑤池玉洞天報答誕生之辰香一

炷燭二枝淨果裹湯當設三位分志純于一者餘諸降日只用設一位分香燭果湯稽首禱告無願不從

凡禱正念者上聖無不從人所請啓聖記云宋朝仁宗皇帝因轍軻問詔命道士洞神法師王伯初庭對休咎事於登壇日燒化御封心詞俯伏出神齋表達上穹翌日敷奏臣伯初昨趨吳極奏對罷朝迴至西天門葛將軍見報曰真武已保明蒙玉帝御筆教旨賜延聖壽一紀帝悅賜御筆聖

記贈真武街嘉祐二年正月日敕準寶應閣長生玄都殿賜銜也謹錄于后降真讚曰萬物之祖盛德可委精貫玄天靈光有煒興益之宗係合大同香火瞻敬五福攸從詔書伏以靈天肅正俯降塵寰通明護國定亂殊聖現前感應施惠救民顯照圓成所禱悉從是願所求皆有證心不但國王大臣道僧士庶一切有情能恭香火普及所意無不果遂以斯福善住世專事濟人承恩者庶廣不可思議今既獲于聖佑

於國於家豈擅忘於大道延福增齡永祈保祚除已行恩天下啓聖奏章一百四件並係功成正化謹就玉津園建其聖堂報答天鑑得蒙現足垂靈仍賜為社稷家神崇遵真武上聖宜可授玄初鼎運上清三元都部署九天遊奕大將軍左天罡北極右垣鎮天真武靈應真君奉先正化寂照圓明莊嚴寶淨齊天護國安民長生感應福神智德孝睿文武定亂聖功慈惠天侯右准教宜令祀授龜蛇贈封施行其龜蛇

二聖街注在本經前祛妖攝毒之句下也然乃靜思虔誠誦其神呪然者道指也靜思處靖虛坐也虔者懇誠者信誦者念其者斯神者神明叩齒誦呪呪者蓋以聲發禦邪虛皇經曰身垢不淨以世水洗之心垢不淨以法語洗之或自首罪亦自洗也

北方玄天杳杳神君億千變化玄武靈真騰天倒地驅雷奔雲隊仗千萬掃蕩妖氛雷公侍從玉女將軍鬼神降伏龍虎潛奔威鎮五

嶽萬靈咸遵鳴鐘擊鼓遊行乾坤收捕逆鬼摧斬魔羣除邪輔正道悉常臻急急如元始上帝律令

按紫光經云此神呪出神寶君秘書也太陰化生水位之精虛危上應龜蛇合形盤遊九地統攝萬靈無幽不察無願不成劫終劫始剪伐魔精救護羣品家國咸寧數中未甲妖氣流行上帝有敕吾故降靈歲攝正教蕩邪辟兵化洽黎兆協贊中興敢有小鬼欲來現形吾目一視五嶽摧傾急急如太玄律令敕

按行道品經三洞大法九品第九曰神呪能驅除疫癘掃蕩妖氛蠲却精邪最為第一也  
太上說玄天大聖真武本傳神呪妙經卷之三